

代州道後馮氏誌傳目上



吾宗自上世以來名在吏部者歲常十餘人然惟 先祖巡撫
君爲通顯其餘至兩司者裁三人爾以廷正家世所聞見類皆
約已守道寧使名位不登或無以贍其妻子未嘗干進苟得以
隕家聲其于鉅公修士懷文抱德一節之美莫不傾心交接託
以久要故沒世之後哀誄銘誌多有名篇爲光家牒論者謂馮
氏所難非獨科名仕宦也惟其素風清謹後先一節其事皆可
表述又恒得老于文學者爲之稱美傳信以昭于後世是爲難
也譜旣成因錄得如干篇釐爲二卷以附于後後之子孫可以

知勉矣裔孫廷正謹志

處士君墓表

貢士君墓表

貢士君墓誌銘

熙宇先生傳

布政君墓表

布政君墓誌銘

布政君家傳

秋水先生傳

參議君墓表

訥生先生傳畧
贊

給事君墓誌銘

南寧君墓誌銘

南寧君家傳

先大夫實政畧

主事君墓誌銘

台州君傳

台州君墓誌銘

按察君墓誌銘

嘉禾君墓誌銘

巡撫君墓誌銘

雷州君墓誌銘

雷州君軼事記

鄧州同知君傳

編修君墓誌銘

秀山君墓誌銘

永豐君墓誌銘

貢士合三君墓誌銘

馮定九家傳 馮瑤鑿別傳

湖北按察君墓表

處士馮君墓表

定襄

余不造值先嚴之喪閉門枕凶不關通人事久矣
子叩門手其兩尊人狀請曰先孺人之喪祔先府君葬有日矣
惟是樹墓之石無所稱載敢以累吾子言與淚發嗟馮君余方
抱終天之痛而安能寫子痛抑諺有之同病相憐余觀馮先生
有文行忠信之實而不獲永其年孺人有淑慎惠慈之賢而不
獲豐其享其兩人者均之乎有作則燕翼之勤有顯承繼述之
允而又不獲食其報樹欲靜而風不寧子欲養而親不待蓋黯
然悲悼不能喻之於懷則安得而無言馮先生者諱愈字汝進

別號章泉貫世振武衛父天祿敕贈文林郎知縣母劉氏敕封
太孺人生男四其所由顯以仲子昌黎尹恩而先生其季也先
生幼而敏慧諸所覽誦領會超詣常詮年十七補學官弟子員
嘗築室沱水之陽集同志十餘輩攻苦鉛槧極伏臘弗稍輟時
業已抉精摘華該綜羣籍文突峯奔濤駭人前後督學使者屢
擢高等曰馮生龍華發霜刃哉剗犀截鶴易耳先生亦自擬芥
拾一第而文奇累試不售益發憤爲焚舟計乙酉本房擬首竟
以表觸時忌落格同志輩戲先生曰龍華發霜刃未先生曰咄
嚙周敦於夔夔雕鏤之市而不回世盼吾何覩焉於是進取意

絕先生孝友根於至性與人交相然諾以信義矢死不移性喜
施遇所急傾筐倒囊不吝也當文林公太孺人無恙時夔夔奉
養日務探志不懈遇所獲廩餼一切跪獻任分給諸昆焉居父
喪哀毀支床幾至滅性仲兄昌黎公疾祝天以身代病霍然已
南涯張生病篤母老哭託以後事先生爲盡力延醫得一異人
起其疾張生每語人今世可以託生死交者馮君耳其他行率
類此先生雖困於一第乎所縮帶知交皆翩翩有名士下帷授
經戶外履滿人各望其腹而去有超登顯仕者先生垂翅自若
居無何竟卒年四十二惜哉仁者未必壽耶孺人痛絕呼天誓

以死殉當是時遺孤男女六太孺人春秋高矣泣諭之曰以是
藐諸孤呱呱然在抱而余髮如此種種也可若何孺人以爲然遂
勉襄大事風持而雨掖行綜而坐理食規而寤晝卒奉太孺人
終天年而保孝廉諸昆弟底於成立云孺人者姓劉氏蘇村大
安之行三女十五歸於先生言動閒恪壺政斬斬遇妯娌以和
撫婢媵以恩內外六親曲有禮意而其大者在孝親慈幼蓋先
生歿而獨以一身支俯仰之累數十年不爲劫每雞初鳴問姑
安凌晨進食如新婦儀姑病旦夕侍寢藥水火坐卧必親蓋不
解衣者三月其勤瘁如此及姑之沒而孺人哀可知也有伏棺

捍火所不難爲者自馮先生背後諸孤鞠育稍長遣就外傳夜則以紡績課讀時時道說先生之平生奮勵之及伯子補青衿拜堂下孺人望之喜且悲曰咨孺子余不見若父衣冠若干年矣言已泣諸孤亦泣歲庚子伯子遂舉鄉試第二伯子天才迅發青霜紫電品也人曰馮氏諸福方來劉孺人壽未艾乎而再逾年癸卯孺人亦遂卽世孝廉君所爲擗踊哀號轉益悲也傳生日昔司馬遷有言學者喜言無鬼神然言有物聞之馮先生初生時母劉夢慶雲滿天中有神女首裝翡翠以銅索下一金系白澤變化閃爍不可迫視而先生誕卒昌厥後又庚子秋孺

人夢白衣婦人報曰汝賢孝吾爲爾子送書釋棘果得雋蓋觀
音云而里中尼有黃氏者精於禪其化頗異孺人未卒時入夢
曰涉世苦乎業緣畢矣盍西歸去來越十日而孺人逝夫仁者
之有後作善之多祥則天兆之哉則天兆之哉其他世系子姓
具詳誌中表其大都如此

貢士馮君墓表

同里張鳳翼撰

馮氏之以經術顯也自昌黎尹文泉公昆玉凡四人伯氏業賈維揚以鹽筴佐國家緩急季氏通尉繚穰苴法登武制科其最少者爲郡學生章泉公章泉公有丈夫子三而孝廉爲長母劉孺人夢紫衣天使降于庭寤而生君甫七歲卽自請就外傳日誦數千百言無不了旨常取金剛楞嚴諸內典繙閱慨然有出世之思已讀蓼莪常棣則又曰吾道在是不必他求也未幾而章泉公卽世時君方髡兩髦仲在襁褓季才彌月耳貌孤相對日夜呱呱君從廬塊捧負不自知柴骨之不支也年十六升

博士弟子員廼於沱陽卜築攻苦下帷爲文奧衍宏深不事經
生帖括學使者行部輒校置高等才名籍籍噪晉冀間歲庚子
得雋省闈以第二人應解額海內士傳其藝者價比雞林識者
謂掇大物直承蜩也無何而劉孺人告寢君衣不解帶躬浣廁
踰且額天請以身代洎瑤而血淚爲枯矣三年間寢不去苦食
不御膳每薦餽涕泗橫襟慟二釜之不逮也先是祖父居積甚
厚子母之權以數萬計或教之分箸君愀然曰吾何忍以阿堵
傷諸父心乎卒廉取之仍割盈以贍兩弟而自居其縮肆雁門
稱孝友者必曰馮君云又塾師李熒獨晚而喪明君念其無依

喫著之需時爲典幹旣歿復厚殯焉可謂恩義兼隆已友人馮
某負雋譽丁年不祿妻子幾不能自存君惻其孀孤曲爲周給
暨今交游感德人人道不容口也大抵君豈弟慈祥出於天性
而澹泊寧靜之養更夔絕時流爲孝廉凡十三年未嘗以片牘
干公府至拯人之急解人之紛飲人以和導人以善卽孔北海
陳仲弓不多讓焉余與君十載同袍千秋知己常見君方頤廣
額豐鬢蒼顏以爲福具三壬之象而文章華國行誼式鄉俱足
以永世長年乃以哀毀失經竟卧文園之病彼蒼何可問也當
壬子春疾革走蒼頭召余爲訣因執手曰天乎吾誠不意中道

拋少婦割幼子溘焉奄棄也然吾母生吾嘗夢紫衣人降庭疇
昔之夜某亦夢金衣人相邀然則障業圓矣儻得徂與母同日
復何憾哉初劉孺人以正月九日卒君之不御賓客也亦於是
日異哉君易簀時元嗣如京纔九歲諄諄焉以保世亢宗爲訓
言今業舉茂才有聲膠序矣而母王猶以柏舟之節厘荻畫之
儀儻所稱賢萃一門非耶余忝司風紀職在闡幽故表大端於
邱垠以爲世勸其譜次世系以暨配首載張方岳先生誌中茲
不贅也君諱明期字闇若號熙宇庚子亞元生萬歷三年二月
十七日卒萬歷四十年正月初九日今其子如京以天啟二年

八月初三日窆于花家莊之新阡張鳳翼曰余嘗讀春秋世家及三國史見顏子淵管公明大德束於小年長才詘於短算竊嘆天道難謀然不虞其竟厄吾執友馮君也君德行文學雅不愧先民矩矱迺第蹇而壽亦不永豈造物真有忌耶雖然夫歿而妻見靡他之節父亡而子昭繼志之能有此兩者君可以含笑地下矣故余表而出之

Handwritten characters, possibly a signature or title, located in the right-hand column.

Faint, illegible handwritten text in the middle column.

Small handwritten characters at the bottom of the left column.

明庚子亞元熙字馮君暨配崔孺人合葬墓誌銘

賜進士第中奉大夫奉敕整飭寧夏河東兵備兼理屯鹽糧餉
陝西等處承宣布政使司左布政使兼按察司副使眷生張崇
禮譔

賜進士第中奉大夫河南等處承宣布政使司左布政使年弟
盧維屏書丹

賜進士第文林郎河南河南府知嵩縣事眷生楊鼎樞篆蓋


余里孝廉馮君以萬歷壬子正月九日捐棄館舍時冢嗣如京
甫離襁褓家人權厝君于正寢越天啟二年壬戌如京壯而有

室乃始營葬于城西二十里花家莊之原將以八月三日祖載先期俾余志其歲月禮也夫歲月流轉千古如常而人之閱歷歲月迺修短不齊或相倍蓰而莫必則余不能不于馮君有深慨焉君祖貫雁門振武衛人代有隱德至祖天祿生子四人皆賢而有幹才伯曰忠仲曰恩叔曰惠季曰愈愈卽君父也忠與惠皆饒研桑心管五而恩愈則專治博士家言兄弟怡怡有活荆化犬風致已而家大饒益遂以貫雄一郡而恩且早領鄉薦獨父滯弟子員一夕母劉氏夢一紫衣仙人駕彩雲降于庭際留其一而去旣覺誕君兒時卽有大志不作姁姁態且聰達過人

日誦數千言寓日輒不忘人皆竒之年甫志學父遽見背君哀
毀逾禮泣血三年樂樂怛怛人未嘗一日見其怡色旣襄事乃
下帷發憤朝夕讀誦無間寒暑且事孀母備極辛勤撫嬰弟不
厭顧復所師李生竄甚君饋贍十年一如事親然沒爲之具棺
斂築塲服心喪三年友人馮盛世死無所歸君慨然曰於我殯
更分齋符數百以贍其妻子嫁以爲常蓋孝友得之天性而好
義樂施不伍流俗其他矯節懿行未易殫述庚子射策登省闈
第二名入方豔之而君操行益謙向學益篤意泊如也其器識
過人又如此明年母孳覲疾君爲露禱願以身代躬侍湯藥衣

不解帶者累旬母竟不起時弟徵期可期皆各成立而喪事君
獨肩之戚而且易一切儀數殊逾前喪然以哀傷之過經營之
勞從此亦多病矣辛亥之冬夢一金甲神人語曰而處人世生
豪家乃極儉素今夙業圓滿吾奉命逆而西歸而勉旃覺而異
之曰韋馱耶胡爲乎來哉居數日果櫻消渴之症度不能復起
從容處分家事畢呼子如京抱而囑之曰兒讀書須以忠孝爲
本當身體力行以成我志無徒章句是等言訖靜處一室又數
日端坐而逝距生乙亥二月十七得年纔三十有八嗚呼以君
之才之行卽伊周事業孔孟道德奚所不造而竟止此耶然予

觀其子年甫弱冠名擅膠庠駸駸乎將向顯融則君固未死也
君諱明期字闇若別號熙宇初娶京山侯崔元姪孫女生一女
適進士孫傳庭繼娶王司徒乾亨女生男女各一男卽如京娶
定襄傅少宗伯新德女女適楊進士鼎樞男仲芳一時姻黨戚
里蓋皆稱望族云余惜君之不永年又幸君之有後特爲志其
生平而系之銘 銘曰孰是好修而靡究其成孰是茂實而靡
遂其名福不讎德嗟嗟馮生豈理若數真不可窺測抑商之積
將盡鍾於京爰勒斯石以印來程



11

11

誥贈通奉大夫馮熙宇先生傳

樵李周拱辰紀

晉蓋有熙宇馮先生學者嚴師之猶曰關西夫子也以今方伯公貴封如其官人更稱爲贈公云家世服儒祖父伯叔著績文武有聲贈公生而穎異甫七齡庭跪請受書明經公以嬌穉難之遽問曰古項橐何如人公大驚異爲擇傳課業目炯炯十行下而沈悟給捷酬義無滯師爲心折詫曰真項橐也明經公製衾選饌兼程以督孳孳望成立亡何捐館贈公年舞勺擗踊哭泣如成人禮衆皆以爲難十六隸芹宮築室沱陽琴書獻歌寥寥自命嘗曰文章不

經國筐篋無尺書一以性命經術爲真學問爲文不借譜
俗豔淵古澹逸自杼機軸每一文成自讀自譽向空而笑
曰持此以當郭隗駿骨燕臺黃金何必不倍價乎歲庚子
果以第二人登雋習俗新貴人獲旗化我騶呵駢肩傳通
家刺五百里內郡縣視爲食邑而公泊如也嘆曰古人恥
呈身御史今顧有呈身孝廉乎終其身不通府胥片牘一
如寒素時時北堂春秋高歲時捧卮酒上壽視寢視膳雜
色笑而進之以爲常退卽闔戶勤公車業不休思得微半
通之綸報大母以慰大父而會大母龍鍾善病宵衣侍湯

藥者幾闔月卒不起號天血罄神情實悴苦塊三載淚與
腸枯又以十三年張憑孝廉船不得沾寸祿一展色養居
常念及卽涕糜下竟溘焉齋志傷哉王戎死孝君子憫之
而非之然而未可非也母子身也百而莫贖其何愛於髮
膚之生公爲人慷慨然諾孝友敦摯先世素封或有以析
箸進者却謝之曰而未能肥疇速諸父乃以饜屬失諸父
心胡孝也取僅十之一曰於我足矣而更以其羸佐二弟
讀且身督之成瞽而貧李某者童子師也死無以殮爲泣
然曰服其訓而委諸草莽乎棺衾哀悼之如哭寢之禮執

友馮某蚤世無以畜妻子分粟帛給之終身疏財服義代人至今歸德焉先是成童時喜佛教浸淫內乘誦詩至蓼莪常棣之章曰幾誤矣君親卽佛何用此髡者爲敦古正誼卒成巨儒其勇於任道類若此明經公諱愈生丈夫子三贈公其長也嗣人如京卽今方伯公屏翰江左爲

興朝重臣孫雲驥乙未魁天下以風雅名績學傳家忠勤助國榮昌故未艾云

外史氏曰昔人有言人不可以無年吾於贈公始孤此語以贈公故自足千秋也大母劉夢紫衣神降庭寤而生公

昔孟母夢泰山神騎白馬降庭生軻卒成巨儒與素王同
食公道德文章爲吾儒領袖何渠不並軻而兩哉
天子大旌死者勸生者祀之瞽宗與軻同食姑須之矣

皇清誥授通奉大夫廣東等處承宣布政使司左布政使馮秋水先生暨配

誥贈夫人馮母傅氏合葬墓表

刑部右侍郎年家眷弟張爾素頓首拜撰文

工部虞衡司郎中年家晚生劉元琬頓首拜書丹

直隸吳橋縣知縣眷年姪任先覺頓首拜篆額

國家大業權輿必篤生魁磊宏通之彥以襄

聖天子草昧經綸之治膺盤根錯節之任其人蓋指不多屈若馮秋水先生其豐功偉績猶赫赫在人耳目間嗚呼先生

今不可作矣先生兩公子郵志狀屬余表余同晉人知公且久伏讀志狀謹撮其大節而表之按志馮氏徙自青州諱盛者始以軍功來盛生時時生天祿封文林郎昌黎知縣以次子昌黎尹封也四子諱愈號章泉歲貢不仕先生之祖也博學好古其行義尤高章泉公三子長諱明期先生之考也明萬歷庚子第二人鄉薦邃理學篤孝友學者稱爲熙宇先生祀鄉賢配王夫人先生母孀節數十年建坊旌表馮氏之危而復大者維夫人功別詳邑志節孝傳後以先生江南布政

皇清覃恩則

贈祖考考皆如其官

贈祖妣劉夫人

贈前母崔夫人

封

母王太夫人也先生諱如京字修隱號秋水九齡鄉賢公疾篤撫而泣曰孺子慧且謹勉之必大吾門余不及見若成立矣王太夫人遂以盛年矢節母子伶仃俦俦相依弔影耿如也先生幼不好嬉執父遺書且泣且讀王夫人教以詩書十四五卽有聲閭里定襄傅文恪公見其文竒之曰馮生一日千里經濟才也遂字以息女傅夫人歸先生恭儉莊肅交相成也先生起家明經舉賢良方正明末刺

布政君墓表

二

卷二

史灤州墾荒以復流民攢槽以革民驛異政則蝗自投水
盜不入境至今北平人稱頌之不衰嗣遷永平府同知駐

昌黎

皇清受命之元年以迎

駕遷永平知府 賜袍帽旌異所在爲治有聲然先生之尤著

者定榆西之寇亂守湟中之危城靖浙西之劇盜蓋有三
竒功焉先生自永平遷靖邊副使時逆闖甫平人心未堅
邊隅伏莽根葉盤互無何而黃色倭起色倭故降盜勇敢
數十人闖敗歸里聞賀珍圍西安援川潰卒數千人緣塞

下色俊喜曰是可乘之機也遂集叛卒呼舊盜幾萬人焚
劫園林驛遠近震色俊名隣帥有聞風渡河走者先生獨
將標營兵數百出奇設伏破走之追斬色俊及盜魁數十
人是役也以寡擊衆以羸卒擊方張不靡

朝廷餉輸不煩督撫征調豺狼翦滅大難削平其奇功一由
榆西遷西寧參政任數月卽有河西猗賊之變蓋猗賊爲
謀積數年反城中殺撫鎮道將甘涼肅州數日皆叛聲勢
號二十萬人攻陷莊浪遂圍湟中蓋西寧古湟中地番漢
雜處最爲難治卽有土著猗族三四千人先生示以恩信

登陴拒守大小數十戰城賴以完孟大司馬破賊定河西
先生以戎服見孟公喜可知也血戰乘城目不交睫者三
閱月太夫人毀簪珥犒士城中食盡人枵腹執兵是有巡
遠之節睢陽之守而幸免其禍其奇功又一由西寧移金
衢叅政衢屬九仙山故盜藪也渠翁大洋者四出剽掠爲
浙西大害前後討之不能克垂二十年蓋其地層峯仄徑
松杉荆棘之叢蒼猿猩狐狸之啼嗥翁賊又熟地險多伏
弩毒矢火鎗之具將帥視其地爲虎穴魅窟惟警備其出
不能窮搜也先生至則慨然以爲已事督營將標兵擐甲

轉戰數十日奪其險入山又十餘日殲其黨生縛大洋致
浙督麾下士民歌舞於路從此獲安枕僉謂卽宿將勇士
亦未見肯入重險與逋賊爭一日之命者其竒功又一前
後戰功皆上其事於

朝率蒙

旨優賚迄今事具司馬府至右藩江南則脩明正學門弟子日
益進時應 詔有陳四事疏切中當世利弊時論趨之左
藩粵東覈荒稅絕耗羨勵官方恤民隱積逋八十餘萬期
年而足額督撫以卓異薦於

朝時先生敝歷南北文武有功稱 廷論以節鉞待之先生
以母老遂決意歸里

朝覲畢道壽州以病免覲時有應 詔陳粵東四事疏

天子是之與江南疏均以文多不具錄前是灤永秦浙江南皆
奉太夫人侍養署中粵東炎暑道遠太夫人已七十外長
孫驥先侍歸里故先生孺戀不願睽慈親不復仕也歸而
匆匆色養克盡子職丙午正月太夫人寢終號泣擗痛哀
感路人馮氏祖阡距代十五里先生力疾徒步挽喪每慟
至血濡面如淚先生由是時時感疾病遂以康熙庚戌閏

二月十七日不起先生生於明萬歷癸卯八月二十四日
至是年六十有八臨訣明達了徹絕無怖畏誦孝經危坐
而逝是夕大風拔木里舍兒或夢蕭鼓導先生赴新治嗚
呼若先生可謂不媿太夫人孤孀之教生死表表稱完人
矣先生爲詩古文獨標意致擺落畦迤含咀英華匠心獨
妙所著有秋水集行世他著若春秋大成聖賢正諦史疑
等書學者宗師之然先生雅不欲以風雅名紹鄉賢公之
傳究心性道以躬行實踐爲基以修身成物爲事故入孝
出忠不敢毫有作僞累建殊績而未嘗自伐其功招降納

叛全活數千萬人遇患難則以義命自安置成敗死生於
度外畿輔三秦江表粵東之人皆誦思立祠衿士奉其教
誨率進退有繩尺致政歸閭宅偏構小園築亭樓聚書數
千卷焚香宴坐其中訓子孫以矜重名節廉讓謹厚爲德
於鄉黨存問故舊收卹宗族義館以待來學賑粟以贍饑
窶又十年而考終天下薦紳學士識與不識咨嗟慨嘆以
爲忠孝淳備名行脩立其用而表見於當世爲景星慶雲
蒙其化者如春噓旭照及投艱大理幽深也如干將莫邪
之鋒蟾閣飛精之照海內指目先生如喬嶽鉅川庶幾復

能興雲致雨惜也未老懸車天不憊遺用矣而未究其用也元配傅夫人孝敬執禮奉太夫人未嘗色忤以先生艱於嗣捐簪橐買一妾宜子者以進時時勉先生以讀書持身無墜先業誦內典諸書晰其大旨生於高門不好華飾鮮服常謂三黨諸媪曰男正位乎外女正位乎內修身齊家一也以二十八齡不祿安坐莊語無悲愁顧戀時子驤僅四齡也夫人非明達賢淑曙理義者能如是哉繼配楊夫人都諫公孫女仁孝性成南北數十年諄諄相勉以廉節急流之退夫人實勸成之今大年康強爲馮氏宗媪以

覃恩贈傅夫人 封楊夫人辛丑夏

上俞禮臣請 賜祭葬如令甲六月十二日晉藩臣奉

諭祭讀文致牲醴九月先生二子將合傅夫人葬先生於花家
莊之原先生二子一女二孫二孫女雲驥進士戶部主事
雲驥已酉舉人女適崞縣貢士張伊雲驥生子璧貢士女
一雲驥生子壘女一俱幼余謹節志狀而表諸冢右之石
若先生勲德流於天壤文章傳於後學先生自有不朽者
在至遷除之歲傅夫人生卒之詳具載志狀故不復再著
云康熙十年辛亥秋九月吉旦

皇清誥授通奉大夫廣東等處承宣布政使司左布政使馮秋
水先生暨配

誥贈夫人馮母傅氏合葬墓誌銘

都察院左都御史年家眷弟杜篤祐頓首拜撰文

內宏文院庶吉士年家晚學生王維珍頓首拜書丹

國子監助教年家晚生李含春頓首拜篆蓋

康熙庚戌閏二月廣東左方伯馮秋水先生卒於雁門有
司聞於朝

皇帝諭祭葬如令甲辛亥秋將與傅夫人合葬祖阡公二子民

部君驥孝廉君驪請志於余手狀號涕曰孤不天先大夫
棄捐中路唯是先大夫之行跡功業四方人多指而述之
然或及聞見其所已至其始終隱見或缺焉惟先生綜而
誌諸石不獨家訓是則

國史郡乘其有所取信焉余辱公知且久誼不容辭謹爲志
之志曰按狀馮氏徙自青州明成化中以軍功授衛職守
邊諱盛者來雁門是爲代馮氏始祖二子長時時二子長
天祿號壽山力田讀書隱居樂道時稱爲處士公以次子
恩昌黎尹封文林郎昌黎知縣配劉封孺人處士公四子

皆以文武科第顯四子愈號章泉卽方伯先生之祖也尤
力學敦行築室沱陽明經授徒不干謁仕進章泉公三子
長諱明期明萬歷庚子鄉薦第二人遂濂洛學學者稱爲
熙宇先生執喪廬墓讓產二弟高節懿行邑人上其事祀
鄉賢炳炳矣邑志別傳詳哉其言之也以子方伯公

皇清覃恩贈通奉大夫江南右布政使室崔

覃恩贈夫人生女一繼室王以二十七齡孀居孝姑撫幼屢奉
旌表世稱節孝王夫人八十有一終操義別詳志乘

覃恩封太夫人卽方伯先生母也先生諱如京字脩隱號秋水

別號紫乙先生生而頎秀穎悟絕人幼授書外傳一覽能
誦既早孤太夫人常撫之泣曰馮氏世有隱德茲孱焉不
絕如綫者未亡人其及見成立乎故訓先生甚嚴正不使
嬉戲暇逸先生矻矻勉學又以天資駿邁遂博綜羣籍六
經子史天文地志陰陽律歷之書罔不爬抉幽渺含咀英
華每試輒冠多士文太青袁臨侯兩先生先後督學竒先
生引置書院食餼講學崇正丁卯吳衲如先生校士拔貢
試如秋闈法吳公精嚴選擇務在得人先生立成七義刻
漏未下吳公擢爲冠軍試文傳錄爲之紙貴再上鄉試輒

病文不能滿志再中副車先生嘆曰是命也夫益勵志理
學實踐躬行曰吾母在承歡色養孝友是亦爲政奚其仕
會明帝下詔求材先生以賢良方正應辟舉廷對極言時
政帝覽策竒之將大用其言頗切直柄璫弗善也遂授灤
州知州灤畿輔近地累值兵荒或虞先生寬厚不任艱劇
曰灤孔道刺史送迎無寧晷且奸猾根穴近貴恐非長者
能勝任時灤饒積牘牘數倍他邑而黠吏欲以事嘗則操
牘緩急雜進之先生間取一二不急者立扶之曰若何以
此恩乃公且某某條舞文某某條翫法不悛必重懲且死

老吏咸吐舌稱神明州大害僉民應驛歲破千金產數家
先生申兩臺爲官驛立石永禁民害以息歲蝗祭禱蝗投
爍水死歲以大熟咸謂先生精誠能格天又進三老子弟
教以孝弟力田子衿餼食課藝勸讀誨以古聖賢修己正
身之法案牘暇諸士從而問道講論豐壘弗厭倦也往來
客亦造請無間然未嘗有所餽遺三載大治流亡復業者
數萬家僉謂我公活我予我父母妻子兩院交章薦帝下
其治爲鄰邑式遷同知永平府分署昌黎明年闖寇破京
師先生棄官扶母避地昌黎之書院山北平豪李生舊門

下士集壯士守山砦先生指授方畧設險保聚無何李自成寇山海餘寇四出攻剽山民恐懼日夜數驚先生謂衆曰狂寇雖號數十萬然紛無紀律茲來山海聞晝夜急趨兵法百里蹶上將軍行且立碎莫予毒也已言未已寇數百且至砦下攻山伏發殺其半僞王將軍中礮死越數日而寇大敗關下

天兵追剿至永平父老萬餘人遮執政大臣呼曰願得馮公守茲土親王特檄徵先生再辭弗獲

皇清受命之元年夏遂拜永平知府 命秋以治橋迎

駕功

賜袍帽旌異蓋曠典也先生每治政畢朝太夫人輒問
了積案幾事出寃民幾人當意則喜不當意則色不自得
恚督過之先生性至孝恐失太夫人意翼翼自修飭所至
以公廉稱蓋得於慈訓云等遷陝西榆林西路兵備副使
時秦地新定所在伏莽邊人黃色俊者勇悍故盜魁閒居
鬱鬱不得志聞川賊賀珍圍西安會有援兵千人叛歸流
劫莫適爲帥色俊遂招故盜及叛卒自稱將軍焚剽村聚
破園林驛逼靖邊城脅衆且萬人靖邊副使駐衛也先生
將數百人出奇計擊之帳下卒韓國相烏鎗中色俊股墮

馬復跳賊黨殲焉三日追禽之時寇強兵弱人心震搖咸謂靖邊必不保鄰帥頗有走險者又諸舊將謂先生儒者未必嫻軍旅聞先生發兵咸危之紳民或涕泣諫止及見臨陣矢石先生勇氣百倍指揮設伏諸老將人人以爲得意中我兵轉戰奮怒以一當十鄰寇惴恐不敢復發秦邊由此遂定撫軍上其事 賜賚有差再遷撫治西寧參政履任數月河西徇叛甘州院鎮皆遇害發庫兵假位號衆且十萬西寧古湟中河西五郡之一也西郡陷守官皆走湟中城守月餘獨完數十戰我兵罷矣先生闔室且爲自

焚計適秦督孟公兵至大戰河上寇敗走還保甘肅先生
助兵圍甘肅八月而寇平以守城功 賜加一級遷浙江
分守金衢嚴道叅政衢屬九仙山故盜藪山盜渠翁大洋
數年負嶮結閩海餘孽爲聲勢先生率兵攀蘿躡磴窮巢
焚窟生縛致浙督戲下露布告捷蓋先生恂恂退謹禮讓
人也然決大策臨大艱刃斷機發曾無疑濡屢值兵戈出
奇制變獎勵士卒與同甘苦故以少擊多屢建偉功一時
海內稱先生魁磊雄傑知兵能戰陣豈知先生究心性道
絕口不道孫吳耶蓋余曾任延安司李親見先生榆西平

寇事知先生尤深且切其仁而能勇大槩如此先生尤工
詩古文詞與浙文士某某爲風雅交詩誦倡和若干卷尋
擢江南右布政使乙未冬

皇帝下詔求直言先生疏四事崇理學謹兵權實京倉慎邊守
其一事畧曰國家之治亂由人心之邪正今開科取士無
不以經明行脩爲重然以八股爲羔雁士多尙文辭而忽
踐履至明末有講學之禁則以孔孟之真傳視爲疎濶之
迂事伏乞

勅諭天下敦本黜華俾各省督學諸臣責令師儒轉相訓誨徵

聘潛德幽光之士興起衰俗修明有明薛陳胡王諸君子
之學醒其清夜發其良知孝弟之理明綱常之道著卽愚
夫愚婦亦知聖人之理如此其易簡可學人心正而天下
治誠

開國萬世之宏模也其三事詳奏議中文多不具錄奏上
廷論遘之先生于金華則捐俸校梓王魯齋柳道傳遺集江
南刻穆叅軍集春秋大成後學賴之江表名士多從之遊
賦詩稽古彬彬焉尋以粵東左藩缺人當是時海氛甫定
兩王重兵屯守左轄司餉不繼徃徃罪免 廷論材先生

遂以正推上

制可先生至而釐鹽政覈荒稅檄隣省之逋運剔官吏之侵肥
欠餉八十餘萬未期而足嗣是兵餉按月關發無壓欠累
兩王奇先生加異禮焉先生持身素廉一切苞苴謝不通
未嘗加屬吏以厲語然屬吏面之常躬躬不自安蓋以先
生不受一絲一銖無以爲結納地也然賢者頗知所以交
先生矣吏治爲之一清粵兵燹餘民賴以大起又五嶺百
越之地夙稱多玳瑁象齒沈香犀貝諸奇物先生屏絕峻
切署中惟一石視曲江一集老屋敞椽蕭然塵榻僚案至

布政君墓誌銘

七

卷二

見若此或曰公曷爲自苦稍潤之顧不愉快耶或竊哂其迂謂通世故者殆不若此先生行意不之顧督撫遂以卓異

聞已亥覲 京師疏廣東四事別荒稅以足徵輸禁雜派以供惟正嚴委署以肅官方移重鎮以靖海氛指切粵中利弊甚悉

天子嘉之下部次第推行時太夫人春秋高以嶺南炎暑道遠不能迎養官舍攜曾孫璧先自江南歸里門先生時時以北堂爲憂念故答魏光祿詩有北堂歸夢寒雲外南海多

愁力疾中之句已而嘆曰人生有至性富貴浮雲耳余母
老善病數十年侍藥餌不暫離今忍睽違萬里外耶余意
決余其歸矣時先生功伐甚著聲譽甚高

世祖方不次進賢者內外更調以留先生姑旦晚可躋孤卿不
則牙蠹可立俟矧先生子成名矣太夫人有曾孫侍養先
生無急去時不可失先生謝之曰公休矣余無善狀竊祿
十五六年毫髮無所補益

聖天子不以爲戮而寵異之負且乘又違老母遠遊不孝罪滋
大從此願乞骸骨養老親不敢復從諸大夫後以病身冒

布政君墓誌銘

卷三

厚糈矣

皇上卽憐臣復其位寧不自愧忤乎公休矣勿復言覲畢歸粵道江南壽州怔忡遂大作直指衛公請於

朝得致仕歸時多惜之者先生以得事太夫人爲悅也太夫人年七十外矣每感疾進刀圭一七立奏效蓋積誠侍養於表裏虛實所以致疾之由或風寒或飲食無不洞悉其原故不待切脉檢方書而奇驗指功十無失一故太夫人康強十餘年先生白首太夫人尙無恙辨色入子舍竊問侍者起居不敢令太夫人知侍食承顏色暇則治食邀諸

黨媪與太夫人笑語爲娛以爲常時長子驥廣文雲中歲
一謁督學便道過里次子雲驪孫璧從家塾歸先生攜之上
壽太夫人前訢訢如也先生課子若孫唯道義質行常曰
余不獲事先大夫然竊讀其遺書服太夫人教兢兢隕越
是懼余一生得力在孝經小學近思錄女曹念哉仕以忠
君盡職無令名之難非無賄之患讀書以修辭立誠本之
則無書肆說鈴也善若登惡若崩可不慎哉諸子孫奉教
唯謹先生尤好施與以

賜俸市粟施貧無告者月五施人粟升五每施一二百人計

歲數百石老僕郝姓者主之置義塾以來鄉人之欲學無
束脩者館穀邑王生主之先生家居不以非時謁守令或
宗族之顯重而過舉者面斥之不少假亦素熟先生爲人
無忤也宅偏構小園亭樓池沼畧具名曰知園蓋取知止
知足義教子孫讀書其中或故人過從賦詩飲酒酒酣談
說少年鬪塞兵戈事慷慨歌呼故人或乘先生歡笑時卽
說某某困阨不自振救先生卽解橐中數十金或百金或
指某困粟爲贈亦豪舉哉執太夫人喪哀戚甚悼迨襄葬
事病毀骨立馮氏塋距代二十里

工按先塋花家庄實距城二十五里而弱今此

云二十里行述又云十五里疑行述刻戚友見先生杖而本或偶落二字而此則舉大數而言也

仆者數號泣止徒步先生挽車執紼徒跣如古禮由此疾病遂時時作先生故善攝生又以太夫人病學禁方長桑之術六十外和粹如四五十者痛母氏見背晝夜哀號鬚髯齒豁無復曩時精力矣服闋年餘冢君由國博轉戶部主事次子鄉薦乙酉稍爲慰也庚戌春竟感寒疾卒臨訣朗誦孝經一徧謂楊夫人及子孫曰若無哀造化定理余久知之矣時大風拔木里人或夢簫鼓導先生赴新任亟走視先生第已治喪秦吳人聞之奔走呼號有千里赴弔

舊部曲有數日哀號不食者嗚呼若先生內行淳固勲業
高朗馭歷南北數十年未嘗留意聲色玩好其所奏議可
著 廊廟進退出處矚然不滓先生之學可謂安且成矣
所著有秋水集粵槎日記北征紀畧官詞十餘卷春秋大
成三十一卷聖賢正諦十卷古今雁字詩選六卷行世一
統志畧歷代詩錄道學鈔史疑等書若干卷藏家塾享年
六十有八生於明萬歷三十一年癸卯八月二十四日卒
於

皇清康熙九年庚戌閏二月十七日元配傅夫人先先生四十

年卒已葬爲乙丑進士禮部左侍郎兼侍讀傅文恪公女
端靜嫻內儀未嘗疾音忤視出自名閥而能以勤儉相夫
子其事太夫人最孝謹拮据家政治麻臬酒食皆中度操
下斷斷而不殘女紅而外靡不服勞治百禮周六親文質
相宜也以先生韜於育慮子終鮮力謀置媵先生峻拒之
而竟從母家密橐百金擇良家一姬進其賢淑世所罕見
者先生故多長者遊客至必盡驩率倚辦於中饋夫人悉
心籌計時時以紉爲羸故度閣靡不共滌灑靡不具時留
客酒餼輳進秩如初筮久之遊道益廣得內助者居多夫

人讀書明大義恒勉先生曰太夫人孀節二三十年煢煢
風雨馮氏累葉危而復續惟夫子光大之可不敬哉無何
構疾早世按察其訣時莊語了了生死絕無恐怖居恒誦
心經金剛諸內典如有悟豈非明達義理者哉年二十八
卒生於明萬歷三十二年甲辰八月二十六日卒於明崇
正四年辛未六月初二日

覃恩贈夫人繼配楊夫人兵科給事中楊公諱恂孫女事姑撫
幼備極孝慈長子驥爲傅母出撫之恩勤備至從夫子南
北數十年以廉節相砥礪敬相維功焉

覃恩封夫人傅夫人生男一雲驥乙未進士戶部江南司主事
娶施氏繼娶黃氏楊夫人生男一雲驥巳酉舉人娶魏氏
女一適邑庠生張尹孫璧貢生娶張氏孫女一驥出幼孫
壘孫女一驥出辛亥九月合葬於花家莊之原銘曰灤水
湯湯先生清卓哉循吏龔黃名秦山古堞吹腥風塞霧蒼
茫殺氣濃驚沙日照大旗紅先生千騎何英雄手縛長蛟
犁虎宮巍然講道東越東天爲後死開鴻濛瘴海憂國心
忡忡合浦珠還大海中歸來行李照清風杖頭惟有雪冰
文奇光上散爲星雲下爲芝草金玉英名山大川護幽冥

千秋浩氣長如生
松栢蕭森夜鶴鳴
明月耿耿照佳城

皇清誥授通奉大夫廣東布政使司左布政使秋水馮公傳

古蔚同學魏象樞撰

公諱如京字脩隱號秋水家本齊青州人先世諱盛者始徙雁門盛生時時生天祿封文林郎昌黎令文林生四子季諱愈歲進士是爲公祖生三子長諱明期字闇若號熙宇萬歷庚子以第二人應解額生平篤學力行沒祀鄉賢世稱雁門先生是爲公父母太夫人王年甫廿七卽寡守志五十餘載

詔表其宅爲節孝以公貴累

封太夫人是稱太夫人實生公公九歲失怙性不好嬉一循太
夫人教授以詩易輒成誦如宿習出就外傳博綜羣籍爲
文不屑爲尺幅恒語甫弱冠以諸生高等餼於廩崇正初
詔郡國選士公哀然爲三晉舉首然數奇善病屢躋秋闈
乃益邃心理學若無復庸心進取者迨庚辰大舉海內明
經行修之儒公聞之興曰初進士起隋代而循良盛於漢
家豈盡由甲乙第乎乃赴廷對多關切時政語除知灤州
如摺積猾復流亡驛不累民蝗不爲災種種諸異政州人
歌詠焉三載遷永平郡丞無何甲申流寇陷明都賊徒擾

亂三輔公不得已避地山中仍數與北平豪擊殺賊之攻
砦者蓋知寇虐必不久其膽識過人遠矣

王師入關聞公名檄還郡署尋擢守永平是秋東迎

世祖皇帝駕道經盧龍令支間多崎嶇不可行公乃跨灤水爲梁
數十丈民不知勞

乘輿甚安之

賚賜慰勞渥至闕明年丙戌擢按察副使戊子晉大叅歷陝
西榆林西寧浙江金衢諸道江南右布政使

覃恩誥授通奉大夫追贈兩代祖考皆如其官祖妣劉前妣崔

皆爲夫人以廣東左布政使致仕公在榆林則平黃色俊
之亂西寧則平猗賊丁米之亂金衢則平翁大洋結連閩
寇之亂皆躬履戰陳殲渠散脅而地方晏如其在江南也
應

詔陳言條上崇理學謹兵權厚儲積謹邊兵四事疏入

報

聞其由粵東入

覲也疏地方利弊如別荒稅以足徵輸禁雜賦以供惟正嚴
委署以肅官方移重鎮以靖海氛諸類

世祖皇帝下其章令所司議行蓋與前報

聞之

旨皆嘉之也先是公在粵東當平靖二王駐師之地度支維繁非如在江南時僅司鼓鑄得優閒嘯咏已也公雅量既能輯偕兩藩將士時出其精敏之才釐鹽政覈荒稅不一年中至完積逋八十餘萬督撫以卓異

聞行且遷秩公念太夫人春秋高庾嶺顛灘之險不能板輿迎養且入

覲役竣冒暑南旋行至壽州病憊不能前矣乃力請於

朝得解組歸年甫五十有八耳歸侍太夫人備極色養閱七
年太夫人以八袞壽終公泣血三年至葬哀毀幾殆猶扶
掖徒步至窆所聞公善養生家言素康強及太夫人卒遂
精神日減寢以成疾享年六十八歲端坐而逝所著有道
學鈔史疑歷代詩錄其行世者則秋水集粵槎日記北征
紀畧宮詞古今雁字詩選聖賢正諦春秋大成若干卷子
雲驥順治乙未進士戶部主事雲驪丙辰進士庶吉士餘
具誌狀中

舊史氏魏象樞曰公以雁門人杰蹶起仕籍由良二千石

躋方岳稱守藩重臣至今

畿輔五原湟中於越金陵南海間有召公之思焉乃年甫逾
艾卽決志懸車歸闕一知園日著述其中未嘗遠出里門
及通刺長安雖冢嗣七載雍博第勉以勤職業勿躁進而
已聞者稱之至其著述甚富而大成一編允爲海內春秋
家津梁正諦尤理學一派先儒謂周禮爲天理爛熟之書
余於斯編亦云跡其生平事母孝服官廉居家仁處鄉義
要由其學術醇正而莫非天理所形也且冢嗣雲驤以濂
洛關閩之學奉庭訓與余互相砥礪克振家聲先生之所

貽又如此嗚呼賢哉

馮秋水先生傳

平城處士徐化溥撰

余嘗攜筇戴笠陟勾注溯沱水見其山川形勢雄麗迴錯蓋必有碩儒至人挺生其間乃問之山澤農疇則人人能言之蓋有馮秋水先生云先生時尙爲諸生也然其炳蔚之文仁孝之行已籍甚三晉越二十餘年而得交令予訥生因得讀家乘且觀先生所爲秋水集知先生益詳蓋先生九齡背父零零俤俤賴母夫人鞠之孀燈秋雨熊丸虬漏母子弔影耿如也先生則幼岐嶷不好嬉太夫人明詩書能爲經生家言授以周易毛詩神解超悟一過輒成誦

長就外傳不屑斤斤帖括博綜羣籍凡經史子集兵農律
呂九流稗志探之罔弗蒐精洞微文太青袁臨侯兩先生
爲督學使竒其文屢置高等食餼時年三十一矣丁卯以
崇正龍飛拔雋時一沈璫禍之後督學者嚴爲校試鑿棘
置三闈吳衲如先生首拔之深爲器識遂名噪山右然以
數竒試秋闈輒病七作率不能滿志嗟乎命也杜甫之詩
也而不舉唐進士千古而下豈以此少其才乎顧先生益
修明陸象山王文成之學頗無意於科名仕進會有保舉
賢良方正之詔先生以明經應聘廷對極言天下削弱不

振上下矜虛文典法淪敦治身者先治心治國者先治朝
今用人理財大典朝夕更改未得要領而鰓鰓西寇西寇
未易平也策入明帝竒之文多不備錄授灤州刺史以兵
燹後民散田蕪胥役故多大猾見先生年少易之先生甫
下車卽擊除其積蠹數輩摘奸發伏左右驚以爲神諸弊
釐而百姓聞之復其室家者恐後矣邑大治謠爲真父母
蝗災祭蝗蝗投灤水遂絕遠近異之邑中大害民驛一節
前刺史率皆以殷實應馬頭一歲破數家千金之產官胥
亦得上下其手於僉報之間因爲利故久弗革也先生至

則攢槽爲官驛請兩院永載爲法邑人德之立石文詳別錄中三載轉永平府同知又一載而李自成破京師先生避地書院山與北平豪李生王生輩守山砦擊殺賊之攻砦者王將軍未幾李自成敗走於山海關下是爲

皇清受命之元年也時入關諸王聞先生忠且賢檄歸永平先生辭以疾弗獲乃擢爲永平太守秋八月迎

皇帝駕入關

上賜宴賜袍以旌之蓋時跨灤河爲橋數十丈治道之崎嶇高下者數百里民不勞而工集

上慰勞之甚優丙戌有榆西副使之命平黃色俊之亂盤根錯節以別利器信矣蓋黃色俊者勇且黠川賊賀珍寇西安榆林徵卒叛色俊因得煽衆聚萬餘人掠榆林震色俊名不逞者多附之勢滔天也先生出奇計以數百人戰園林驛色俊爲內丁韓國相烏鎗擊墮馬跳復走其黨殲焉三日追禽色俊以疲敝之卒當梟張之寇定風鶴之驚其績甚偉事詳榆西蕩寇畧別有明文可考戊子有西寧大叅之命值狃丁米二逆變河西郡邑相繼破先生守城四十餘日大小數十戰西寧獨完少司馬孟公兵至圍乃解二

載遷金衢道九仙山諸寇連閩叛擾我宇先生數戰皆捷
擒其渠翁大洋閩寇僭服皆遁去嗚呼先生何數之奇也
北平則闖孽榆西則色俊湟中則徇逆金衢則翁賊然能
以其絕材上智削大難成大功澹定不驚儒者之有體有
用所由異於高視闊步而迂疎無濟者矣金華故文獻地
先生則取王魯齋柳道傳諸遺集梓之置學官與范子驤
陳子今聖祝子基阜嚴子天顏輩賦詩講學著春秋大成
學者宗之前後說春秋者弗能儔已而擢江南右藩右藩
鼓鑄給滿洲兵芻糗爲事官貧約然事頗閒日與詩人余

懷顧夢游杜濬紀映鍾輩爲風雅交有元夕倡和詩刻乙未冬

皇帝下詔求直言先生疏四事畧曰其一崇理學以定人心也國家之治亂由人心之邪正人心正則爲忠孝人心邪則爲亂賊今開科取士無不以經明行修爲重但明末有講學之禁則孔孟濂洛之真傳視爲迂腐不切之故事伏乞敕諭天下務在敦本黜華修明致知盡性之學俾各省督學諸臣獎勸責成令師儒轉相訓誨修明薛陳胡王諸君子之學醒其清夜發其良知孝弟之理明綱常之道著以之事

君則必忠以之居官則必廉以之臨民治兵則必知方有
勇卽愚夫愚婦亦知聖人之道如此其易簡可學人心正
而天下治誠

開國萬世之宏模也其一優將帥以謹兵權也古帝王聞鼓
輦而思將帥之臣疆場禦侮賴師武臣之力故汗馬血戰
之功有不可泯沒者大者世其爵祿小者予以榮膺然亦
當酌陞遷調任之法定三年五年之制俾將帥知所激勸
其在兩廣楚蜀用兵需材固不宜輒爲輕易至若腹裏巨
鎮久典兵權逾時不遷在大將有積薪之嘆而尾大不掉

之虞亦恐漸釀而不覺所當定將帥之遷轉調任以酬其
勲勞而無俾久留一方者也其一實京倉以厚積儲也爲
國先貴足食我

朝漕運以供京儲誠萬世之利然所運止供支給且河道容
有遲滯輓運或有參差

朝廷根本之地豈可無三年九年之蓄或當責成各屯道以
附近新興屯糧運入都門或倣招買平糶之法廣積糗糧
令所儲浮於所費且可以賑窮民備荒政誠亦當今之要
務也其一練邊兵以鞏巖疆也今天下四海一家中外無

故卽有一二小醜不難滅此朝食然兵可百年不用不可一日不備其在九邊沿海兵裁餉減雖節省之法然裁兵太弱不足以彈壓一方且以九邊四海之大處處必恃禁兵爲援是以稍有寇起則官兵不能撲滅必請大兵蕩剿比大兵至而地方已受蹂躪賊勢已成大兵往返之供給賊寇殺擄之靡費已倍數年之軍糧矣是孰省而孰費也今當於要衝之地酌其虛實權其緩急增練精銳足資彈壓庶可以壯干城而消奸宄也丁酉秋以左藩任粵東粵戰爭之餘設平靖兩王兵鎮撫龍旗鐵馬屯卒塞郡城卒

獷悍大將多倔強易文吏先生能以德化之先生且從歷邊塞兵戎地左右亦多長劍短後盱眙猛毅之士故兩王戲下諸大將咸帖服於糗糧輸放間不敢輒爲凌厲挾持語先生則釐鹽政覈荒稅累欠八十餘萬之多一年而舊逋悉足兩王竒先生益敬禮之先生又持身廉約耗羨幣帛之事一屏絕之不特暮夜不敢干也督撫遂以卓異

聞歲己亥

覲京師覲事例方面以地方利病

聞先生疏粵東四事畧曰其一別荒稅以足徵輸也粵東兵

六
四
燹之後荒殘已極省會附近之區稍稍安集至於雷廉瓊
一帶人民稀少彌望蒿萊凋零尤甚臣受事以來曾經詳
請督撫按臣繕疏呼籲奉

旨勘驗在案而恩施尙未下究夫賦稅度支原供經費軍需之
用軍士按月支給計口授食否則有庚癸之呼今全粵歲
需百四十餘萬本省額賦除折徵外止得五十萬餘俱借
資於協餉而現在雷廉瓊荒稅又二萬六千六百餘頃臣
司責成於長吏有萬不容緩之情長吏誅求於下民有萬
不可道之法獨是瘡痍殘喘而督令輸熟賠荒則又萬不

能得之勢也臣在廣省見有攜男挈女而鬻者雞皮菜色
輾轉於溝壑者大半皆雷廉等郡之民夫民雖至愚何忍
背棄鄉井而輕去故土乎所以然者熟田之所入不足以
供正賦而荒土之賠累並不能給饘粥此流離遷徙勢所
必至也臣愚以爲早緩荒土一日之徵卽早足熟田一日
之賦早甦民間一日之力卽早給軍士一日之需請

敕下撫按清查踏驗暫蠲荒稅民力稍蘇再圖墾熟取盈額賦
則荒殘之土地漸闢而全粵之賦稅不匱也其二禁雜派
以供惟正也粵自軍興以來帶甲數萬粟支數千征輶四

出絡繹奔命廣州建旆而外如南韶之孔道庾關肇惠之衝邊蒼梧有司徃徃以身殉供億且屢屢

明綸之嚴飭矣其或幹辦自任者原於一時之權宜亟求集事奏功爰有公務之名更相沿襲間有其事已竣其功已完而公務雜派如故粵民皮骨空存何堪剝骨而吸之髓哉臣愚以爲宜設定循環簿五扇一存撫按司道一存經臨縣邑有必不獲已之費有司官公同地方鄉紳士里酌量答應登記循環於每年終取里排甘結彙報撫按司道撫按轉報內部稽查驗舉則奸胥無借端侵漁之弊而窮屋

有甦息更生之望矣其三嚴委署以肅官方也委署一途之爲民害久奉禁革粵東邊地遙隔

神京遇有員缺候部補選難以猝至且現在職官寥寥地方需人料理故例有撫臣當堂僉委之舉但旣委之後自知砥礪者固不乏人而不肖者徃徃有之雖撫按有所訪聞嚴加譴訶罪至究逐然此輩從前名不挂部則錢糧之叅罰莫治貪婪之追贓罔恤遇有缺出神通八面儘有巧計鑽營移花接木者夫部選之官一有罣誤尙且難言滿沅豈可姑容若輩復生覬覦之心乎雖近將委署職名另行

造冊達部誠綜核之良法臣愚以爲宜將簽委原冊開載
某職係某衙門批允候簽某職係某衙門移送詳請歲終
一併報部則不獨委署本員之官評大彰各有吏議攸關
之恐而舉用者當更惕其慎惜名器之思矣其四移重鎮
以靖海氛也防海之設向於江南浙閩濱海地方設立堡
所汛地亦綦密矣今又於溫台添設重鎮以扼全浙之門
戶於七閩簡用督臣以控漳泉之要領兩相呼應如左右
手法誠最善至粵東瓊府僻處海南廣肇潮廉並濱海口
計其道里距浙閩奚啻數千而賊艦巨舶迎風鼓浪意南

意北瞬息而至故十四年七月逆氛甫離閩漳八月浙台
遂告陷台州甫平復薄廣潮蓋潮州實連閩省爲兩廣之
內翼昨平藩重兵親臨彈壓賊艘望風遠遁至去春藩兵
甫轉省會而澄海倏爾告潰臣愚以爲潮州要地似宜移
駐重兵分發汎地與閩浙相爲聯絡勿得僅以分汎堵截
苟安隣壑則窮鮒無能鼓鬣而餘氛指日蕩滌矣至於肇
慶陽江舊有雙魚海朗二寨戰船巡邏外洋城守遊擊轄
兵千名以備海防近因錢糧不敷戰艦未造又分城守官
兵移駐高明每遇春汎反借兵東安以爲防禦此又就肇

言肇似應皆復其舊者也疏入

上嘉之然其言過切直時議未能悉舉行其誦粵東疾苦則不
減流民圖也先生喜吟咏記述於道路劇冗中揮毫弗輟
故赴粵有粵槎日記輯瑞有北征紀畧二書觀者謂其曠
觀冥搜元情絕照勝致能吳船務觀蜀記斯時也先生聲
望重功高人亦稍稍忌之故先生有答魏光祿詩曰異國
炎荒迴不同屏藩幾載誚無功北堂歸夢寒雲外南海多
愁力疾中萬里星槎甘卧雪一肩行李羨飛鴻自憐迂拙
違時尙德化誰諂媿大馮已而嘆曰富貴浮雲耳不遑將

母功名何爲余母老善病曩余迎養侍藥餌今豈可久睽膝下也或勸先生旦晚且躋三公建牙纛稍緩數時拂衣奈何先生笑謂曰若知余志哉余懷歸十餘年矣曩爲太守辭榆西辭江南辭人亦孰不欲富貴顧至性安可強旣而以炎暑赴粵東勞瘁感怔忡疾至江南會直指衛公以按臨至晤先生詫其尪羸困憊以請於

朝乃得解組歸余觀世之於軒冕組紱也求之惟恐不得故或聞相傳者謂某老且不去某病且不去某爲人排擠再降再起且不去蓋榮利縻之沉濡不可割也若先生則無

時不求解位卿大夫爭強挽之人士爭勸留之而必行其
志其於世軒冕組紱也殆推而惟恐不去者與夫人必有
所戰勝於其中而後可以輕世於其外先生以聲華得意
之時抗疏而解當世祿位之榮入山而甘老萊投畚之寂
所存固遠矣嗟夫先生蓋深於道者也

皇清誥授中憲大夫福建督糧道候補布政司參議馮君墓表

并序

經筵日講官起居注禮部尚書祁陽王澤宏撰

經筵日講官刑部尚書加四級新城王士正書

翰林院詹事府詹事崑山徐秉義篆額

康熙戊寅前福建督糧道參議馮公捐館越明年己卯冬

十有二月其 輕千里走幣至京乞予言立隧道之石

余與少參公同年友也與公相知又甚深予亦何能已於
言不爲公誌不朽耶謹按狀公先世之以經術顯也自

黎尹文泉公始文泉公昆玉四人其最少者爲郡學生章
泉公生丈夫子三孝廉公爲長子孫卽方伯公方伯公生
子二長卽少參公公諱雲驥號訥生順治辛卯舉於鄉乙
未成進士公穎秀而文好講學甫六歲卽能詩喜閱內典
由博學尋改部曹丁外艱歸徒跣哀號悲感行路服闋復
任刑曹用法仁恕都下有佛子之稱

欽差通州坐糧廳有武弁石姓者曾任振武衛左屯千總與公
爲難當公任通州糧廳時其人適運糧至爲旂丁告發公
卒爲平反後以刑部卽奉

簡命提學全蜀路由秦中烏道蠶叢人馬過者股栗終日而公坦夷自如下車見蜀初當平定民生未遂士氣不振公早夜督率作養勸諭慨然以振衰起弊爲已任時有僞道留僞卷一箱公院當堂焚毀人心始安又夔州譚逆授首部文凡生員譚姓者革去生員解送公因詳明督撫咨部言夔州距全蜀或數百里或一二千里雖係譚姓實非一家無辜株連殊可憫祈查明具結果非一宗遂免解送保全者不下數千人事後士民送三百餘里號泣不捨復

命歸里授陝西驛糧道雪都司陳某之寃吏民畏之如神愛之
如父母行改福建督糧道秦中人士送之亦猶蜀也至閩
下車卽懲姦蠹雪民寃童叟稱快家製一主以祀公後署
藩篆除草火耗 胥吏積勞既久遂成嗽疾後因事左
遷民爭餽送紳給塑公像配享朱文公祠中

本朝以名位配文公祠者惟公一人旋里日吏民夾道而泣
采旂金鼓絡繹不絕計自署中至舟際凡六十里榮哉公
也歸里惟以賑貧濟人爲事未嘗有片紙入公庭也日與
弟翰林公侍楊太夫人側暇則至別墅兄弟子孫講文作

詩一堂四世天倫之樂於公爲極乙亥楊太夫人去世公
哀毀自傷遂感舊疾屢治不愈戊寅十有二月十四日子
時手持一編端坐而逝所著雲中集國雍草瞻華稿蜀遊
篇松化石襍著十餘卷行於世生子一璧乙卯舉人候補
府同知先公而歿元配

誥贈恭人施氏出按誌恭人天性恬淡幽閒貞靜慈惠孝謹鄉
黨稱之繼配

誥封恭人黃氏生子一早夭女三俱夭

下缺八十四字

庚辰八

月十有二日其舉公之柩祔於方伯公之新阡與施

恭人合葬焉享年七十一歲公生順死安榮哀具備公雖
亡實猶生也故爲撮其大畧爲公表於無窮也

康熙三十九年八月吉日

訥生先生小傳

馮雲驥字訥生順治辛卯科舉人乙未科進士通政司觀政授
大同府教授內轉國子監博士陞戶曹通州坐糧廳尋轉刑曹
康熙己酉科順天分房戊午科福建正主考壬戌提督四川學
政丁卯陝西驛鹽糧道己巳轉福建督糧道致政歸侍母備極
色養與弟雲驥友于甚篤待人接物恂恂和易從無疾言遽色
好施子歲養貧人一百餘名而自奉則布袍蔬食有寒士所弗
堪者處之淡如也居官侃侃剛毅守正不阿喜汲引後進官輒
所至皆祠事之四川置主文翁祠福建置主朱文公祠崇祀鄉

賢所著有春秋說約約齋文集飛霞樓詩雲中集國雍草花園
偶輯瞻華稿涉霞吟青苔篇行世

馮訥生贊

平城徐化溥

讀書萬卷而吸乎精華揮毫五色而根乎質至翩翩乎風裁而
無裘馬槩赫赫乎魁名而無制科氣冲然儒素欲乎大器若斯
人者比之祥麟在陬而鳳儀可以表世

皇清勅授文林郎

日講官 起居注翰林院編修改禮科給事中懿生馮公墓誌

銘

賜進士及第奉直大夫

名修

大清一統志總裁禮部侍郎仍管詹事府詹事事兼翰林院侍

讀學士充

日講官 起居注庚辰科文武

殿試讀卷官武會試正主考前詹事府少詹事右春坊右庶子

翰林院侍講左右春坊中允翰林院編修乙卯瀾江鄉試
正主考年眷弟徐秉義頓首拜撰文

賜進士出身刑科給事中前翰林院編修門年眷姪湯右曾頓
首拜書丹

賜進士及第右春坊右中允兼翰林院編修受業黃夢麟頓首
拜篆蓋

君諱雲驪字懿生氏馮其先青州人徙居雁門家世儒者
王大父諱愈前歲貢生王父諱明期前鄉進士皆隱德不
仕父諱如京歷官廣東布政使以文學政事顯於時布政

初娶於傅生長子諱雲驥而卒再娶於楊乃生君君少奇
警好學沉默寡言言輒驚其長老年十五補博士弟子聲
譽出衆上巳酉舉於鄉丙辰成進士選入翰林三年授編
修又二年奉

命典江南鄉試榜出多一時聞士長洲陸肯堂上元胡任輿後
皆第一人及第溧陽黃夢麟第三人及第其餘官翰林侍
從者二十餘人當世高其鑒初布政開藩江南遺惠在人
尤宏長風流延禮方雅一時大江南北才彥屢聚相與上
下論議考證爲驩樂時公長子以名進士來官舍君以童

子侍徃徃從尊下立疑送難座中人莫不傾矚及君來典
試遺老或有在者交太息君之賢而思布政公也久之選
充

日講官 起居注以太夫人春秋高請終養歸歸七年母卒免
喪補原職尋復授講官歲庚辰

詔選翰林爲臺省諫官君以材在選中改禮科給事中君自以
再世受恩思感槩立節爲國補拾遺闕以報而職在橐筆
攜槩儼仰二十餘年中嘗有不合然者及是改官顧謂其
子曰吾今乃可行吾志矣諸素與君厚及四方賢大夫士

咸謂君道弼學碩必能慷慨建白光於表著相與奉手環
聽居有頃竟邁疾卒康熙三十九年六月十五日也年五
十三烏乎其可哀也已君爲人孝友立廉隅謹飭自守其
初上春官也道聞布政病見星而歸終喪毀瘠家居奉母
與其伯兄恂恂侍側如孺子居平收郵宗黨不以有無爲
解或倍德以橫逆加君絕弗校每旦起讀書書皆手鈔積
數百卷最勤於其官每日必至內館所纂修春秋講義會
典一統志諸書編排綴緝窮日夜不少休與予細見尤數
見必句考商權予恒自愧弗及也夫人魏氏巴州知州步

南之女以

恩封孺人四男壘進士南寧府同知歷

後改名欵

鑿諸生幼璧女子

五人鄉進士張嶼進士翰林院編修黃叔琳諸生高兆麒
其壻也孫男女十三人將以康熙四十年九月六日葬君
於花家莊之先塋於是其孤來乞銘予既與君善不敢辭

銘曰

吁嗟君躬孝弟襟以文祉前美益勸劬宜復始典貢賦掇
奇雋諧韶濩闢天閭付封駁行騰騫銜忠直卽長夜思報
國於戲奈何君止斯我銘其藏後有詒

皇清誥授奉政大夫廣西南寧府同知加二級敬南馮公墓誌

銘

賜同進士出身

誥授通議大夫大理寺卿侍

經筵前大理寺少卿翰林院提督四譯館太常寺少卿通政使

司左右參議仍支正四品俸掌河南道事河南道監察御

史掌京畿道事稽察兩局掌山西浙江陝西道事巡視中

城北城癸酉科順天監試協理河南道事掌登聞院翰林

院庶吉士門年眷弟李斯義頓首拜撰文

南寧君墓誌銘

卷

賜狀元及第

東宮講官左春坊左諭德兼翰林院修撰年通家眷世弟胡
任輿頓首拜書丹

賜進士出身內府戶科掌印給事中門年眷弟湯右曾頓首拜

篆蓋

公諱壘字敬南其先山東青州人自遷晉之代州及今已
六七世高王父諱愈終明經曾王父諱明期孝廉高等俱
以大父方伯公諱如京貴贈如其官父諱雲驢登甲乙第
留史館尋入禮垣稜稜見丰采與其兄參議公雲驤有二

難稱舉丈夫子四公其長也生而穎慧於讀書若其夙習
一過輒不忘方伯公竒愛之爲文洋洋灑灑雖老成人有
不及丁卯魁於鄉越明年戊辰成進士纔弱冠許予幸與
公同升又俱出張吳兩夫子門下相得甚歡予由翰林改
侍御公以是時爲中書舍人游處益親且久窺其爲人蓋
洪範所稱有猷有爲有守者第鳳池清署未有所見之耳
已自中翰遷梧州參曹人或以梧險遠號難治公欣然就
道曰是豈不足爲政耶繼遷南寧參曹受中丞彭公知最
深彭賢者中外倚重撫粵以嚴明不輕標許屬吏人一得

其溫語樂於袞章如伯樂過冀北而空其馬羣也彭中丞公之言曰粵去京師萬里文教未浹洽俗喜健訟於疑惑難決獄爲多又土司錯處搖面獸心之徒乘間竊發至不可制馮君名家子以文章自達其佐梧惟絃歌之急又了無書生氣諸上官以疑案相委屬一訊白黑分蒞茲土者孰與馮參軍賢其佐南寧燭姦發伏悉得其渠魁縛致之盜相戒無擾寧者遇事有擔荷以威信服人人稱清白吏所至善政不可勝紀蒞茲土者孰與馮參軍賢予受

天子命撫粵中得良有司不以入

告非職之稱也其亟薦行將大用之矣疏入有

旨卽擢未幾以黃門公憂去旣除服需次京邸曾有秦中之游
歲暮歸代竟以甲申正月一日病卒年三十有八娶田氏
誥封宜人原內閣學士兼禮部侍郎喜壽公女子男三長元方
次允升光裕其季也孟季皆有聲黌序仲亦業儒非尋常
比子女三夏五元方以狀來請銘予哀而哭之以爲公之
於其家也以孝友聞居官也有政蹟可攷其精研經史旁
及百氏之書皆將以徵諸實用非徒摭拾見長者予方於
公平卜其遠到而竟止此耶銘曰

飛鳴之易出其類也盤錯之試別利器也年雖不逮令名
長也妥以神宅永惟藏也

馮君傳

參 吾李

珠 綱 三

馮君諱壘字敬南代州人也大父廣東左布政使如京以春秋名家世稱曰秋水先生父雲驕仕翰林院講官至禮科給事中君生而穎異好經濟嘗謁魏敏果公象樞竒之戊辰聯捷成進士初補中書已陞梧州府同知衙無事每爲上官剖疏別案事特薦調補南寧同知南寧逼左江與諸土司壤相錯自吳逆後伏莽多有守土置莫誰何君至陰調其一縛致之訊其黨皆獲置魁於法餘釋署爲鄉役率土兵伺盜自是盜未發而捕已至矣一巨偷李亞四聚數百人伏城鎮北橋期舉火諸官出救陪

之大掠君偵知衆盜盡出而亞四在急擒之羣盜賊散南寧故以竹結屋覆之茅比簷相亞每災輒延燒十百家盜因乘之劫掠君命民門屯甕一貯水驗無水者罰立保甲令遇災人搥水一石運至給籤翌日按籤有無施刑賞又使役巡歛所非運水及捕火人卽執懲由是比年無災而盜亦熄歲戊寅湖廣茶陵州有警嶺西南羣醜伏蔓南寧營署間謀旦暮起應當事者震讐計之君君曰吾行辦之密廉得其主名夜呼前釋盜諭以勅力皆屑涕誓死報乃令各招其徒入卽土兵也質明戈兵蟻聚屯城中當事益大駭曰何爲者君曰無他也行釋去矣諸奸見

兵集憎伏莫敢動因按名捕寘之法而犒士兵以牛酒去庚辰
攝府印剔寧關稅弊巡撫彭鵬疏薦適君丁外艱士民攀留不
得至感嘆泣下辛巳李璫入都君浮家都門萬子斯同亟稱君
學者因相會抵冬君延萬子孔氏子尙任王子源及璫論學璫
餽以大學辨業萬子夙有講會壬午卒君乃邀同人十日一會
其廬癸未春璫又入都君廣集四方士列講筵推璫講璫謝不
敏座或問理氣五行及經義畧陳說日晡散去君留璫喟然問
曰聖門所重者六藝今置不問學術烏乎振璫曰君知其由耶
三代以上以仁義禮智之德出而爲子臣弟友之行緯以禮樂

兵農之事而其事則必習之學中一源共委典樂所以教胄子
大司徒所以教萬民也無何遭秦坑口傳身授之學遂湮惟古
聖載德行與藝諸典籍幸有存者于是搜購爬羅誦說多而習
行少謂傳經爲儒者至宋明諸儒又以漢唐僅訓詁未窺本源
乃舉聖門不可得聞之性天立主靜觀中致良知等名以補苴
之上之虛摸太極下之日役章句至於禮樂則以爲緩圖射御
書數則以爲鄙事將子路之兵冉有之農公西華之相禮俱置
學外致使漢唐宋明諸君所與創定宇宙者率用黥盜屠販輩
而所謂傳道大儒且高閣束之待異日天下無事命以珥筆講

書而已不知伊呂周孔當此時亦祇如此否且禮樂兵農不務則所持以盡行者何事養德者何具而德行亦因以亡矣此學術所以日壞天下所以日靡而不可稽也君立起曰然乃徧究禮樂經濟夜深秉燭偕其四弟歷及子考辨娓娓不休璫復言修身齊家務君欣然期立見於行初君童歲詩文卽噪人口顧唾棄弗屑嘗學射應弦中相馬駑駿百不失一尤精筭術測高量遠求探推計古今伸手布籌咄嗟立辦世傳九章書與西洋算法人或輾轉莫解君一覽立剖輒指畫令人人可曉生有巧思凡攻金攻木錐鑿鈐錘之類行則攜之時考次躔度定刻漏

早晚地勢向背皆出意解手成小儀器精巧靈通世業家自謂
弗及也每言制器今不逮古遠甚如考工記弓人一則妙盡物
曲學士不之求工人又沒世不知他率類是嘗欲以農田水利
軍旅甲冑火攻諸器爲一書又欲推春秋以來日月薄蝕五星
行度諸儒同異得失爲一書皆未就見成者僅有諸分指掌測
量方程二小帙製器有簡平儀大銅黃道儀小時日晷銅矩度
器銅渾儀皮水礮乃甲申正月甫三十八歲遂卒矣

李璫曰聖道豈其莫振也哉何馮君之早折也予初交君時窺
其貌癯然目清露詢之則世家貴族疑顏何以不類乃卒短折

悲夫卒後聞有訾謗詎才尤見嫉耶抑所見者遠而左右周旋
乃未至邪使君不得盡其學將誰尤哉

<p>Vertical text in the leftmost column, including the characters 五九 (59) near the bottom.</p>	<p>Vertical text in the middle column.</p>	<p>Vertical text in the rightmost column.</p>
--	--	---

先大夫實政畧

先君諱鑾山西代州人康熙二十七年進士由內閣中書三十四年陞廣西梧州府同知三十六年調南寧府同知三十九年聞先祖禮科給事中訃回籍經撫臺彭公鵬二次密薦材守第一因丁艱未及引

見南寧大盜甚夥李亞四李魁升陳細胞黃某等俱有一二千人爲羽翼量各村寨之大小每年索銀或數百兩粟或數百石方免焚劫少不遂意則公行剽掠殺人名曰包村官不敢詰先君設方畧誘擒李亞四等招其黨擇可用者用爲土練

或署爲總捕寘其家口於城內加以重賞俾以盜偵盜先發擒之故任事一年後南寧盜遂絕三十七年黃明等在湖南茶陵州作叛黃明者反賊吳三桂大將漏網游魂於粵楚諸蠻峒中久散劄思逞苦無隙會茶陵州橫派民變遂請明爲主其僞劄散布左江鎮兵兩廣制臺檄下鎮鎮臺某倉皇不知所措鎮臺署內所延楊某者卽黃明黨也變姓名夤入署鎮臺不知素以爲謀主檄下時彼已先拆閱而各兵受僞劄者皆楊某所勾結鎮臺夜謀之先君言人衆而楊某在肘腋一舉動則若輩先發矣先君笑曰是不難君歸署姑以好語

款之明日五鼓當報公按名禽獮之耳鎮臺雖素重先君然聞此殊不解唯唯去先君乃招所署總捕等領土練數千人駐城外叩門請入然後報鎮臺曰土練至逆輩不敢張也遂按名於城中擒附逆之爲首者寘之法餘置不問並楊某亦囑鎮臺於署內密斃之皆讐服不敢爲變南寧賴以保全蓋鎮兵於土練爲賊時聞其至卽藏匿不敢出素所畏服故也是役也微先君南寧幾有翻城之禍而先君不動聲色定變俄頃客謂先君此殊績其實以白上臺必美擢先君曰一報則將來審讞株連喪身亡家者不可數計吾不忍也遂絕口

不言又秀才宋鴻家被盜殺其父及家口七人地方官壓令
勿報宋生屢控觸怒反禁宋生於獄誣以罪先君下車卽昭
雪擒大盜李黃等杖斃之廣西各官日用凡一錢之物皆取
給地方計一年所用每里甲派銀若干名曰均平開徵之始
先徵此項民困不支先君署隆安縣橫州卽禁革迫署府篆
復嚴行禁革又廣西額中鄉試舉人三十名丙子榜發冒籍
中者過半先君嘆曰粵西天末地人土進身之路皆爲異地
人佔踞將來不至天荒不止又柳州孫獍嗜殺地方文武置
不問甚至塘汛器械爲所劫先君嘗發憤太息以爲此不

問必釀爲亂階矣會彭撫臺至備以此告之凡諸興革彭虛
心下詢其所施設皆自先君發之也先君在梧州南寧皆設
立義塾躬爲講論出俸貲以備膏火丙子巳卯所中式王地
錕劉元清唐復唐等選貢李國正熊經馮儒經等多人皆是
也兩郡多火災先君家給水桶並印籤凡失火無論遠近運
水至並繳印籤次日按籤之有無而行賞罰又備麻搭火鈎
登梯給保甲長火一發救火之具及水皆立至故卽熄梧州
雖廣西地與廣東接壤其大盜皆窟穴交界中東事發則潛
藏西界西捕急則逸入東省兩地文武相諉卸盜日以肆先

君至親履各交界處招其老人知事者並豪強諭以

國法委曲開導加以賞勞嚴行保甲凡來往之人必詢其姓名住址並察其行事間有持械者究其械之所從來置循環簿詳爲記載密簡閱時出不意捕治盜不敢入僉曰今馮公嚴明難欺俟去後方可唯我所爲耳故先君在梧並無以盜告而亦無東省之盜闖入而連及梧人者調赴省城值季時大盜王元先等誣指臨桂舉人朱龍耀爲窩朱故鄉黨自好者而承讞者有欲心以爲朱可網取也先君爭之不能得因白臬臺張公請就官廳訊之分寘各盜詰朱之屋宇如何形貌

如何盜等幾人共一屋幾人同時至朱舍盜言各殊乃詭指他姓之居爲朱室押盜至卽曰是矣又易朱姓名以示盜盜不識朱事乃得白承讞者語塞上臺由此重先君故以廉明熟悉風土調南寧三十八年大禳先君捐奉倡議倣富鄭公救荒遺法行之晝夜指授經畫民免殍死其他如設養濟院以賑孤貧表節孝以維風化兵民雜處之地能令兵不擾民民不疾兵善政不可枚舉故聞訃之後弔奠者填門衍時士民攀轅哭震天有追送過潯梧尙不肯回其恩澤及人可見也

先君官梧寧兩郡時余兄弟甫成童未解事政績多不能
 悉知去今幾四十年先君歿亦三十餘年矣大懼風烈放
 失無以昭示來茲因追憶其大畧記之如左以備異日輶
 軒之採自恨挂一漏萬想兩郡之人口碑當不止此也儻
 能宦游其地尙圖考而益之男馮元方光裕謹識

按是書成於雍正十二年之秋末云儻能宦游其地尙
 圖考而益之迨乾隆二年丁巳先伯祖由廣南韶連道
 陞任廣西按察使梧州南寧近在所屬可以大酬夙願
 矣乃于二年十一月抵任卽于次年五月捐館先猷遺

徽竟不及一爲訪求又二年庚申先祖亦卒于湖撫任
所後遂無宦粵西者迄今溯先曾祖去官之日已近百
年不特粵西天末稽考無由而世遠年湮兩郡文獻之
徵恐亦日就蕪沒真可爲嘆息痛恨者也乾隆五十一
年閏七月十日曾孫廷工錄是書畢不禁慨然流涕謹
識數語於後

137

Vertical text in the central column, appearing to be a list or index of items, possibly including numbers and names.

Vertical text in the right column, possibly a date or a specific entry.

Vertical text in the right column, possibly a date or a specific entry.